

本朝分省人物考

人物考卷之四十九目錄

浙江紹興府

韓宜可

梁貞

王冕

楊恒

劉韶

姚友直

葉砥

趙古則

陳性善

楊維禎

錢宰

趙俶

上網

徐士涓

王旭

朱孟常

錢古訓

馮本清

唐肅

劉謹

唐愚士

章敞

貝恒

胡智

魏驥

王暹

張崑

楊信民

呂升

柴欽

徐初

邵宏舉

嚴迪

趙參

陳贊

陳詠

俞欽

戚瀾

丁川

史琳

何鑑

楊榮

謝遷

王鑑之

王華

黃珣

張景明

目錄終

本朝分省人物考卷之四十九

浙江紹興府一

韓宜可

韓宜可字伯時山陰縣人元至正間行御史臺辟爲  
幕掾毅然拒之洪武初以歲貢薦授山陰縣學教諭  
尋轉楚府錄事十年拜監察御史持風紀不避權勢  
十一年左右御史陳寧胡惟庸中丞涂節侍坐 上  
從容燕語宜可直前長跪出懷中彈文劾陳寧胡惟  
庸涂節險惡如忠奸佞似直恃功怙寵內懷反側擢  
置臺端擅作威福乞將三人斬首以謝天下 太祖

怒曰三人事朕盡職豈有反側之心快口御史排陷大臣着錦衣衛監問尋釋之出爲江西按察司僉事時官吏有罪笞以上悉屯鳳陽母慮萬數卽上疏論刑以禁淫慝一民軌合論其情之重輕事之公私罪之大小而施舍之今官吏有罪不問公私而悉屯鳳陽小人之幸君子殆矣乞分其公私以合輿情 上可之命定於律十三年歸朝京師 上賜沒官男女散入諸司爲奴婢宜可不受且以爲非聖人政卽上疏極論罪人不孥古之制也有事隨坐法之濫也官吏有罪厥辟勿宥國之典也罰其妻子何居况男女

人之大倫婚姻踰時尚傷和氣合門連坐豈聖明  
所宜此必有以夫榮妻子享其樂夫旣犯典章當隨  
坐以重其罰進說者豈盛德之事聖人仁政之宜行  
哉乞除之天下幸甚上曰汝言是著爲令後坐事  
將辟上御謹身殿鞫之時天朗氣清忽雷火遶殿  
上驚而言曰得非枉此人乎雷乃息因獲免封上二  
十餘事皆報可未幾以例罷歸十九年行取到京  
命撰祭鍾山大江文諭日本征烏蠻詔作堯舜禹湯  
傳賢論皆稱旨特除山西右布政使二十一年以  
事安置安南二十三年以翰林院檢討陳性善薦其



德行文學再起爲雲南叅政尋陞都察院左副都御史在臺以鋤奸顯忠爲已任百寮悚惕不敢犯未幾卒於官時大星墜地櫪馬皆驚人以爲應宜可云

### 梁 貞

梁貞字叔亨新昌縣人元至正中爲國子監生端慤寡言由國子伴讀授太平路儒學教授 上克太平貞與諸儒迎見所言輒援詩書有根據 上說之命爲江南行省都事遷湖廣按察僉事兩浙都轉鹽運使拜太子賓客日侍 太子讀書大本堂洪武元年六月命兼祭酒掌監事倣周制以六德六藝從容訓

廸務底於成有異才出類者卽奏聞擢用之初國學  
旣建諸博士皆就職胄子在內府者令布衣高啓謝  
徽教之至是諸生方序立右順門內貞傳 旨下勅  
諸生由受業大學歲賜衣以爲常三年九月坐事放  
歸田里後卒於家

王冕

王冕者諸暨人七八歲時父命牧牛隴上竊入學舍  
聽諸生誦書聽已輒默記暮歸其隣或牽牛來責蹊  
田父怒撻之已而復如初母曰兒痴如此曷不聽其  
所爲冕因去依僧寺以居夜潛出坐佛膝上執策映

長明燈讀之琅琅達旦安陽韓性聞而異之錄爲弟子遂爲通儒性卒門人事冕如事性時冕父已卒卽迎母入越城就養久之母思還故里冕買白牛駕母車自被古冠服隨車後鄉里小兒競遮道訕笑冕亦笑著作郎李孝光欲薦之爲府吏冕罵曰吾有田可耕有書可讀肯朝夕抱案立庭下備奴使哉每居小樓上客至僮入報命之登乃登部使者行郡坐馬上求見拒之去去不百武冕倚樓長嘯使者聞之慚冕屢應進士舉不中歎曰此童子羞爲者吾可溺是哉竟棄去買舟下東吳渡大江入淮楚歷覽名山川或

遇奇才俠客談古豪傑事卽呼酒共飲慷慨悲吟人  
斥爲狂奴北游燕都館秘書卿泰不花家泰不花薦  
以館職冕曰公誠愚人哉不滿十年此中狐兔游矣  
何以祿仕爲卽日將南轅會其友武林盧生死灤陽  
唯兩幼奴一童畱燕俵俵無所依冕知之不遠千里  
走灤陽取生遺骨且挈二女還生家冕旣歸越復大  
言天下將亂時海內無事或斥冕爲妄冕曰妄人非  
我誰當爲妄哉乃携妻孥隱於九里山種豆三畝粟  
倍之樹梅花千桃杏居其半芋一區薤韭各百本引  
水爲池種魚千餘頭結茅廬三間自題爲梅花書屋

倣周書著書一卷坐臥自隨秘不使人觀更夜深人  
寂輒挑燈朗諷旣而撫卷曰吾未卽死持此以遇明  
主伊呂事業不難致也當日佳時操觚賦詩千百言  
不休皆鵬騫海怒讀者毛髮爲聳人至不爲賓主禮  
清談竟日不倦食罷輒去都不必辭謝善畫梅不減  
楊補之求者肩背相望以繒幅短長爲得米之差人  
譏之冕曰吾藉是以養口體豈好爲人家作畫師哉  
未幾汝穎兵起一一如冕言 皇帝取婺州將攻越  
物色得冕寘幕府授以諮議叅軍一夕病卒冕狀貌  
魁偉美鬚髯磊落有大志不得少試以死君子惜之

楊恒

楊恒諸暨人也號爲白鹿生風神俊爽翹然超其羣  
其外族曰方建塾聘賢傳館四方游學士生徃受諸  
經領其玄旨稍事文墨輒峻潔如淵珠衆譁曰生賦  
資絕倫非積功所可及盍遜其一席地聲光流婺越  
間煜煜能動人競投贄延官閭師數弗應浦陽江上  
有鄭氏一宗累五十室同案而饒戒子姓執贄致辭  
生躍然興曰是或可爲也卽日上道臯比中居以倡  
道爲已責日摩月切操行有可觀歷十春秋自以精  
明不逮前時退居白鹿山戴校冠被羊皮裘帶經畊

烟雨閒暇則吟風弄月傲睨萬象若不知古今之殊  
軌有識者莫能窮其際高郵樂鳳來爲州牧獨造門  
拜曰鳳聞先生賢言行無悖古先哲人願爲州學之  
師生牢讓不起鳳不得已令間右子弟卽其家問道  
州政有闕失鳳必移書諮訪生白以利病裨助恒多  
後若干載殿中侍御史唐鐸出守越欲辟起之生力  
辭如前鐸不敢強生性醇篤無銖髮矯僞與人語出  
肺肝相示恥爲覆藏事垂名義峻言斥之弗少恕家  
無儋石儲臨財甚介山氓誤坐法當死生憫其蠢愚  
謀諸鄉鄙活之氓輟烏犍爲謝生拒之頓顙于地潛

然隕涕生曰東作方興非牛何以畊俟三冬或爾至  
期民復來請生反覆譬曉之乃已州人士求連生族  
祝生持其成暨委禽致餼繼以金幣生笑曰孰謂君  
子而可以貨誘乎悉遣去人復譁曰是可以義取者  
生尚不之欲況其他乎於是鄉人教子者恒指生爲  
法焉

劉韶

劉韶字季麓以字行餘姚縣人登洪武甲戌進士第  
授行人司行人嘗持節雲南四川朝鮮所至宣上德  
達民隱餽贐一無所受事聞賜鈔襲衣丁丑陞陝西



布政司左叅政先是陝有逋賦民積歲不能輸有司  
 峻刑督之詔至慨然曰民困不能輸爲之父母又忍  
 峻刑督之耶與其察謀分行郡縣解其勢緩其期勞  
 來綏輯而從容勸誘民皆感激曰是矜念我我可不  
 戮力以累仁人奔走假貸以輸無幾畢完陝不產礪  
 砂而歲月有課額民窘不能償至或償其家者爲奏  
 罷之洪渠水溢爲民患躬行視之爲設法治堰民賴  
 以安在陝四年被召爲刑部左侍郎尤懇懇重民命  
 平反數事陝平民王某爲盜所引逮至而所引者已  
 伏法不能自白乃召所引者之妻子使識之而聽其

詞竟得實王免於誣有典守錢穀而虧免者既被逮則援引千餘人同罪詔廉知其誣卒辯所誣引者釋之河陽逆旅夜月朱趙二人異室而宿朱怨家後追至而誤殺趙朱實不知逆旅主人疑朱殺之追執送官鞫訊拷掠朱遂誣服不敢求辯詔獨曰是偶邂逅相聚非素有負且計其裝非有圖也特緩其獄遣人審察之無幾有司竟得殺趙者而朱以緩獄不死楊州民胡氏夜有賊入其室殺人而遺刀屍傍旦視之柄有鄰家蘇氏私識官捕鞫蘇蘇曰家失此刀久矣不服既備極諸刑竟誣服詔潛使持刀往察其鄰一

童子識之曰我家物也遂得賊而釋蘇蓋其理刑一以求生爲務永樂乙酉纂修大典命太子少師姚廣孝禮部尚書鄭賜監修而擇有文學者一人爲之副遂以命韶討論裁處人多服之庚寅坐失出罪左遷兩淮鹽運判未行復畱丁酉改工部營繕司主事躬勤治職未嘗以崇卑爲意癸卯以疾卒年六十一

姚友直

姚友直名益以字行蕭山人洪武甲戌進士授中書舍人累陞司經局洗馬永樂中宣廟爲皇孫時奉命授書并授斬獻王凡所顧問必以正對王以賓禮

待之未幾陞左春坊左庶子及滕王建國雲南陞雲南左叅政掌長史事滕王薨因事至京宣廟嘉念舊勞擢太常寺卿正統三年正月卒遣官賜祭命有司給舟車歸其喪營葬焉

### 葉砥

葉砥字周道上虞人洪武庚戌以明經取進士第得定褒縣丞兵荒之餘民未安業勤於撫字流亡來歸乙卯坐累謫涼州處之泰然曰吾無愧於心足矣日杜門修學有詩寄子曰不須詢遠道窮達信乾坤更號坦齋又號尋樂作賦以見志士大夫謫居者皆宗

之守將西寧侯宋晟亦延致家塾爲之師己卯以薦  
辟起爲翰林編修復陞廣西按察僉事用法平恕獄  
無冤滯吏畏而民愛之嘗兼綰三道印出按郡至遷  
江會洞獠數出沒爲害吏民洶洶欲遁去且以無備  
請少避砥曰我去縣官必遁民何恃以安卽命料丁  
壯立保伍寇來併力禦之頃之報益急下令如故不  
爲動寇亦卒不敢至永樂初以吏事被逮籍其家惟  
薄田弊廬故書數篋而已事白還之仍命與史事書  
成改考功郎中砥進退人才品第高下小大各適其  
用尚書蹇公一以藻鑑任之不溷以他事會修永樂

大典徵天下名儒命爲副總裁稽經考史無不愜當  
仁宗在東宮緝熙聖學擇儒臣侍講論砥預焉其言  
于上者必堯舜周孔之道非是不以陳爲郎中九年  
俾食四品祿 上親灑翰授之久之引年求去不許  
乃自言於吏部曰砥老矣猶叨祿在朝人將謂何上  
若不棄願得一小郡牧民庶報效萬一吏部以聞卽  
拜饒州知府蒞郡先教化後刑罰興利去害摧姦植  
柔民無愚良莫不愛之如子水旱爲災憂若已出每  
齋沐致禱必獲有年人以爲盛德之應郡故有磁窑  
銅冶而丁調不減他郡砥爲力言於布政司得減四

之一時方營造工之受役者當給糧贍其家布政司下饒州於遠輸內畱八萬石給之砥謂非戶部意不可衆譁然利其便請必從砥終不許未幾部符下他已入倉者皆反之民使遠輸勞費彌甚衆乃服其明決皆拜謝布政司亦自愧其所行凡再述職京師皆以恤民隱革弊政去汙吏爲急然謂饒之風俗厚其民易化有訟者必以理論不付曹吏民知其愛已也多悔悟而罷訟簡刑清民歸德焉戶口增至萬三千士之取科第者數倍於昔年益高而燭理益明遇事亦若無足爲者嘗賦詩以自適卒之月作書戒子孫

以睦宗族和戚姻重義輕利母貽譏於後世尤以不能報國恩爲慊卒於郤解之正寢郡人無賢愚貴賤皆哭之哀距其生享年八十平生爲文甚多今所存者南行藁退朝藁芝山藁經進藁及經筵講義

### 趙古則

趙古則字撝謙餘姚人也後因薦者言遂以謙名宋秦悼魏王之後幼孤貧寄食從山寺與學佛徒同學書克已復禮之目爲用工準的聞金華鄭四表學有根源往師之得其傳歸隱萬書閣潛心大業饑寒迫之晏如也國初徵修正韻稍試其學衆以謙年少黜



爲中都國子監典簿與同官論事不直罷歸築考古  
臺述六書之旨註聲音文字通周易提綱諸書凡三  
百餘卷大臣有薦謙者 上曰吾欲老其才而用之  
復薦于 皇太子乃召爲瓊山教諭明年進所註書  
詔翰林博議不報復還瓊山作瓊臺布學範教化大  
行嶺表以南稱爲趙夫子至今思慕之初謙之來京  
師學士宋濂遣子仲珩受業謙歸之明年仲珩校正  
韻多采用謙說衆固莫知其出於謙也謙學以聖賢  
爲的修己誨人勤勤懇懇至於六書之學則尤精義  
入神得于圖象言意之外謙旣沒門人柴廣敬以聲

音文字通進字學者心好之莫得而見也謙于世利  
聲華澹然無所罣礙直義所在目無王公然終以此  
厄窮無悔卒于番禺年四十五

陳性善

陳性善名復初以字行山陰人洪武十八年進士  
上見性善凝重謂侍臣曰性善君子人授行人司副  
入翰林爲檢討初誠意伯劉基卒命李鐸往取其遺  
書基子璉卽出觀象玩占石室中書從鐸詣闕上  
之性善善楷書召入便殿繙錄上威嚴進見者惶  
汗手顫不成字唯性善動止安雅書法端正上悅

賜性善酒是時威譴叵測性善留竟日家人以爲死矣比出大驚喜久之超陞禮部左侍郎薦薛正言輩雲南布政使韓宜可隸謫籍性善薦起爲副都御史皇太孫在東宮時熟聞性善名及卽位獨召性善賜坐問治天下之要性善所言悉從然施行未竟輒爲司所更性善請見曰陛下不以臣愚猥承顧問旣僭塵上聽許臣必行未幾輒改所謂爲法自戾以信天下靖難兵起改性善爲副都御史監軍建文四年三月辛巳戰靈璧與彭與明劉伯完王資皆被執文皇縱之歸性善衣朝服躍入河死後加追

戮家徙邊已而赦還

楊維禎

楊維禎字廉夫會稽人爲元進士仕奉訓大夫提舉  
建德路總管嘗策蹇視事江南德之歷陞江西等處  
儒學提舉會洪武一統應聘修史抵京僅百日遂謝  
病還雲間後臨革撰歸全堂記投筆曰九華伯招我  
當往及逝聞空中百人步履聲異哉華陽外史張伯  
雨叙廉夫集云今代善用吳才老韻書以古語駕御  
之惟李季和楊廉夫稱作者廉夫上法漢魏出入李  
唐其古樂府有曠世金石之聲宋文憲公景濂亦稱

鐵崖君聲光殷殷摩挲霄漢吳越名士競歸之比東  
海倪元鎮昆山顧仲瑛雲丘張仲簡吳興郊九成皆  
其客也廉夫之跡頗類陶靖節讀其置妾云買妾千  
黃金許身不許心使君自有婦夜夜白頭吟則其不  
白日引去者所指微矣至俠客詞云太阿飛出匣欲  
取賈充頭又夜宿倡樓酒未醒飄風吹落鴛鴦瓦何  
其雄偉豪邁耶

錢 宰

錢宰字子予會稽人吳越武肅王鏐之後博學能文  
洪武二年以儒士舉爲國子助教時郡邑弟子員貢

入太學者設爲教條限以歲月責其功效助教與博士程其課業而升降之旣升舍乃得選登仕籍然士方畏懼爲法所繩惴惴莫有樂學者宰爲人莊重和易諸生每一就之輒戀戀不能舍以是爲時明師十年三月巳卯朔以年老陳情乞休 上許之勅授文林郎國子博士致仕宰旣歸精力猶壯宣 上德意有從之游者輒開廸不倦遠近宗之二十七年四月上觀蔡氏書傳象緯運行與朱子詩傳相悖其他註說與鄱陽鄒季友所論間有未安者遂 詔徵天下儒臣定正之於是兵部尚書唐鐸等舉宰及致仕編

修張美和致仕助教靳觀等並遣行人馳傳取之是年四月至京師入見上語以正定書傳之意命翰林學士劉三吾總其事禮遇甚厚時建酒樓初成賜宰等鈔宴其上人各霑醉獻詩以謝上覽之大悅復遣禮部尚書任亨泰諭旨諸儒有年老願歸者先遣之宰齒最高與衆皆請留亨泰以聞上喜曰朕知諸耆宿終能成朕志其善視之九月巳酉書成賜名書傳會選命亨泰梓行之賜宰等宴及鈔令馳傳歸其鄉又三年宰乃卒壽九十六初宰嘗病近代新聲太繁刻意古調擬漢魏而下諸作及古詩十九首

且各補其未純者詞林稱之所著有臨安集

趙 俶

趙俶字本初山陰人博通經史爲文遒健名重當時  
尤明於毛詩洪武六年春被薦至京 高皇帝召與  
講論經史俶援據傳說貫穿古今每奏對 上輒稱  
善除國子博士旣教胄子隨扣輒應莫不樂得經師  
上一日御奉天殿俶偕諸儒侍側召至前諭之曰經  
學必宗孔子母以儀秦縱橫語示諸生也俶頓首謝  
歸而告誡士子屏去戰國策諸書勿讀自是博經者  
文日益醇明年詔擇諸生之聰悟能文者三十五人



命倅領而顓教之且令修詞以漢司馬遷班固唐韓愈宋歐陽修蘇軾爲法尋於諸生中擢李擴黃義等入文華武英二堂說書多至大用倅自專師席旦夕誨迪不倦士多成業丙辰十一月乙未陳情乞骸骨丙申 上御奉天門御史臺左大夫汪廣洋右大夫陳寧奏曰博士趙倅以詩經施教成均者四年其弟子爲方岳重臣及持節各部者往往有之是不爲無功今年逾七十筋力寢衰精神不完願 陛下放歸山中以盡其餘齡 上可其奏加倅官爲翰林院待制勅吏部給以誥命致仕戊戌倅詣關謝 上召之

使前問曰卿何郡人對曰會稽 上曰向爲兵部侍郎出知萊州卿之子邪對曰是也 上因締視之曰卿誠耄矣歸養其家爲宜俶頓首而退初俶子圭玉官法從時俶作訓忠之書教之圭玉由是服政有盛名世以俶爲愛而能誨越七月甲辰詔出內藏庫錢二十五緡以賜俶拜謝遂行廣洋及寧皆賦詩贈俶和者成什司業樂韶鳳授簡學士宋濂爲序率同官暨諸生千餘人送之都門聚觀者莫不羨其榮遇云俶後考終於家八十一

上 綱

上綱字性常餘姚人也洪武初以文學徵見上親策治道拜兵部郎中未幾潮民弗靖擢綱廣東叅議往督兵綱致書與家人訣攜其子彥達與俱單舸往諭降之還至增城爲海寇曹真所得日爲壇坐綱上羅拜脅爲謀主綱唾罵不絕口遂遇害彥達哀號請代不得且哭且罵曰賊并殺我其酋長曰父忠而子孝殺之不祥與之食不顧則憫其誠孝釋之乃綴羊革裹綱尸以歸後有詔立廟死所彥達子與準閉門力學不求聞達有司以遺逸薦遁匿山中終身不仕

徐士涓

徐士涓字叔遠餘姚人也習聞典故時事洪武初召拜河南按察副使風威大行按視南陽郡值久旱草木俱槁死士涓戒禱得雨歲輒大穰又嘗視事蓬池庭中俄產一竹人皆傳爲士涓之瑞云

王旭

王旭字漢章餘姚人也強學力行隱居教授學者多從之游洪武中以茂才徵拜英山知縣縣多虎百姓苦之旭禱于神虎輒去衆以爲神興學勸農吏民親愛如父母焉

朱孟常

朱孟常字守恒餘姚人也洪武中鄉貢任南平知縣最知名有體要縣逋漁課積年不能償孟常奏蠲之江西民兵採木過南平饑餓濱死孟常出粟賑之俱全活時遣中官刻期督木至南平期迫甚而木未集榜笞官卒衆駭亂孟常力沮之夜有神見夢于中官曰若第去朱令在何患事不濟中官覺而疑之悉以付孟常孟常從容處之事成而民無所擾

錢古訓

錢古訓字古訓餘姚人也武肅王之裔進士調行人

是時緬與麓川相構緬主卜刺浪使使來貢而訴思  
機發于朝 上擇古訓持 勅往諭而以李思聰副  
之至則宣 上威德釋二國之忿罷其兵麓川酋長  
刁于孟者謀攻其主古訓曰吾以天子使臣將事于  
裔夷會小醜之弗靖不能輯寧之以還雖非專命亦  
使臣之羞於是入其部責以大義皆稽首凜凜無復  
逞者思機發以古訓能休爭已亂薦方物願畱爲援  
古訓卻不受作書示以不可思機發得書駭汗遂歸  
古訓於是古訓叙次百夷山川風物爲書還見 上  
并奏之 上悅付在史館賜襲衣古訓後知漳州府

以文章飾吏事表著忠孝激勵風俗甚著聲稱尋改  
湖廣叅議名績愈茂

馮本清

馮本清餘姚人也洪武中鄉貢授監察御史遇事敢  
言不避權貴出按蘇松諸郡彈治甚肅有豪猾武斷  
爲盜主本清逮寘於法籍其家廣東守備王某以失  
機罪應死自列有斬獲功於例得貸王故饒於貲者  
法家避嫌經歲不決本清謂避嫌以殺人法與情兩  
失之矣爲上請王得減罪遷福建按察僉事分巡漳  
南訟牒山委旬日決遣殆盡漳例納帑貲歲計百萬

民間至破產鬻子女償官特奏蠲之興化民盜蘇木  
事連坐應死者三百人本清止戮首犯餘釋不問建  
寧大水漂沒廬舍躬督官民船數百隻爲浮橋以濟  
全活者無算改任江西卒於官曾孫蘭舉進士累官  
江西提學副使

唐 肅

唐肅字處敬自號丹崖居士杭之新城人父始遷越  
故今爲越之山陰人肅生有異質敏而克勤授毛詩  
比長兼通諸經劬及子史陰陽醫卜書數之學無不  
研究爲文簡潔而雅奧律詩步驟盛唐樂府古詩上



薄漢魏所著有平居稿文斷諸書尤工篆楷深得筆  
意至正壬寅歲充賦江浙以道梗不得上省臣便宜  
授杭州路黃岡書院山長轉嘉興路儒學正國朝取  
浙西例起赴南京以憂還洪武三年春用薦至京纂  
修禮樂書其夏擢應奉翰林文字其秋科舉法行預  
考南京貢士扈從東宮拜英陵有襲衣之賜次年夏  
以疾失朝叅例免官歸後例謫役濠陽子之淳官侍  
講詩亦清麗

劉謹

劉謹山陰人洪武中父謫戍雲南伯兄又以督運死

京師謹甫六歲輒知痛父一日問家人曰雲南在越何方家人以西南指之輒朝夕向西南遙拜年十四歲懼然曰雲南雖萬里天下豈有無父之子哉治裝爲尋父計時滇夷初服道路荆楚歷六月抵雲南艱辛萬狀遇父于逆旅相持號慟行道傷悲俄而父患瘋痺欲以身代戍與得歸父而國法戍邊者惟十六以上嫡長男始得更替於是復歸攜伯兄子往而伯兄子亦尚孱弱又復歸悉鬻家貲以往蓋三返雲南始得歸其父也父歸家徒四壁幾不能爲生謹力供菽水晨昏必極其歡

唐愚士

唐愚士名之淳以字行山陰人建文二年勅翰林侍從之臣方孝孺等集數千載經史中事爲一書又命舉優通文學之士孝孺首薦愚士時寓金陵爲李景隆子師立召爲翰林侍讀賜冠帶令與孝孺俱領修書事進講前漢書愚士父肅仕國初應奉翰林文字以故愚士得遍游公卿間宋濂稱其文迨肅謫死臨濠愚士奉喪歸塋求父遺文雖荒郵敗壁高崖斷石靡不纂錄什襲時時伏讀聲甚淒切聞者皆掩涕愚士長身巨鼻博聞多識爲文蔚贍尤長于詩翰洪

武中數從景隆徧游燕薊秦周所過廢都舊邑名賢  
古帝遺跡輒爲詩歌論記性喜飲酒酒酣夜談傾坐  
晚得官近侍未幾病病愈復起明年病甚比卒遺言  
請銘孝孺愚士貧無他宗族喪事數千百緡倚辦景  
隆孝孺爲聞 上詔有司給舟歸葬

章 敞

章敞字尚文會稽縣人永樂癸未領鄉書首薦明年  
登進士選入翰林爲庶吉士偕狀元曾棨等二十八  
人讀書中秘與修永樂大典壬辰冬授刑部主事癸  
巳 命同諸儒纂輯五經四書及性理大全書成重

膺賜賚時近京西山有盜肆劫逮捕數百人鞠之多  
不服敝察其寃惟拘其辭色異者一人餘悉遣出期  
翼日復至同官爭不可卒遣之明日至如約後勘驗  
其人皆非盜而一人辭色異者果真盜衆始服其明  
內申轉員外郎階奉議大夫尋遷郎中丁外艱起復  
改吏部考功郎中洪熙初賜誥命階奉議大夫丁內  
艱服除調驗封宣德庚戌擢行在禮部右侍郎進階  
嘉議大夫奉 詔往安南命黎利權署國事暨宣詔  
利遣人白相見禮敝語之曰吾奉 詔命至爾蓋小  
國一酋長能盡禮於使者卽所以尊敬朝廷何以白

爲利聞卽趨拜坐於下令所親給侍左右數爲功媚  
辭欲眩以聲色敞正色待之終不爲動及還餽臚珍  
異一無所受利曰假此以將誠何拒之甚敞曰吾奉  
命令爾撫輯一隅以廣 皇上一視同仁之恩豈爲  
賂至耶利乃以所餽物付貢使致之且戒關吏俟使  
者出卽閉關敞知之及關親閱所貢方物餘悉封付  
關吏及利死復奉 命令利子麟權署國事關吏見  
曰此天使前却金者比還却所臚如初麟不敢更進  
蓋知其不可以利動也 英宗嗣位之初平陽王復  
封晉王卽以故護衛官軍田廬爲請敞受 命徃冊

封則較其軍數量以用廬歸之餘給於民王不悅敞  
啓曰國中先三衛今止一千戶所以三衛田廬而歸  
一所之人得無過多且朝廷以藩屏望殿下國內軍  
民宜均愛之庶副 皇上至公之意王悟曰使方面  
諸官蚤有此言吾亦豈敢上煩朝廷哉還奏 上嘉  
之未幾遷左侍郎敞恐典禮品式有因革輕重先後  
矛盾之異而吏胥或緣此作奸於是白尚書胡公濙  
取國初至今凡所行條格集記之付四司使得參酌  
而行事獲適宜奸弊頓革太醫院每舉醫者多弗諳  
醫敞察知之遂偕尚書奏革其弊比歲僧道數給度

牒輒以千計乃與尚書請依洪武例三歲一給凡僧  
道出家及舉爲僧道官者止於所居封內不容越籍  
冒濫四夷貢使日給廩餼庖人每侵尅之敝聞之曰  
小人爲口腹計使朝廷薄懷遠之禮可不禁乎卽令  
所司具日給之數付通事者或給不如數從而督治  
自是遠人以爲朝廷待之加厚云於正統丁巳卒年  
六十二訃聞 上遣官諭祭命有司治喪葬爲人性  
質端厚接人待物意氣豁然賙貧濟難尤克盡心其  
問學優裕爲文簡暢所著有質菴稿藏於家

貝恒



其恒字秉彝上虞人舉永樂甲申進士初授湖廣鄒陽知縣縣僻而俗儉前之名能治者率以嚴刻恒寬馭之而導以禮義其民感化相戒母貽羞賢令於利一介不苟取歲餘以祖喪去官寮佐以下致賻贈盡却之而吏民不忍其去有流涕者祖喪未終繼喪母服闋改東阿知縣東阿當南北要衝素苦過使往還共給之費至則規措有方物具而不擾簿有挾私怨緣飾人死罪者恒謂曰盍以直報之簿愧而止鄰邑盜劫人匿其贓古冢中冢傍耕民得之后被劫者識其故物執民訴官民不勝袴掠竟引伏恒臨問而疑

之然非其所當理不得有爲會有人過東阿被盜來  
訴者恒併鄰邑盜事以檄城隍神而嚴督機察兵大  
索數日獲三十餘盜鄰邑刼盜皆在耕民得免冤死  
民有兄弟爭競相告者曉以大義使退而思之兄弟  
皆悔過謝歸獄有殺人賊未決而兩目俱盲恒當就  
審時視其容色若甚戚焉者問豈有冤乎賊曰罪當  
死無所冤但憂身死宗祀無繼耳遂命其妻入侍疾  
後賊死而妻生子矣嘗歲旱躬禱之雨立至有蝗爲  
災引咎自責蝗遽散歲屢豐建議於朝請平糴爲預  
備計從之仍下其議旁近州縣通行之祀典壇廟及

學舍久毀于兵前令率苟且行事恒則率丞簿出俸倡邑人咸作新之有暇詣學進諸生講說以正所業而月日程之令鄉社皆立學時循行田間觀民藝穫以驗勤惰邑西南有灤春夏潦水無所洩泛溢浸衍近灤之民恒廢耕恒親相地開渠納諸大清河召民役之與其佐議簿持不可曰法不得擅役民恒曰所以利之也有罪請獨加我不相及渠成徂人壤千畝耕之卒亦無事苟邑流徙來歸者甚衆綏撫如子車駕征北虜命河南山東西民丁隨軍供饋餉郡邑各遣官率之憚行者往往爲規避計恒毅然起曰天

子親征臣下可避勞耶卽治裝就道民間令行皆忻  
躍以從動息飲食與民同甘苦師旋東阿無一人失  
所者在官雖小物必思及民營繕有餘棄廢鐵敗皮  
朽索故紙之類悉存之工匠閒暇令煮皮爲膠鑄鐵  
爲杵搗紙索爲穰貯之庫會車駕巡幸北京勅使督  
建席殿所貯悉濟急用而民不費有薦其廉公明大  
體堪任風憲者徵命已下縣耆老百餘人詣闕乞畱  
從之九載考績上京師時 仁廟監國知之曰在東  
阿得民心特陞秩正六品俾復任民間恒得復來踴  
躍迎拜數十里嘗坐累罰役京師時有令官役滿卽

復任民競趨代其役凡三罰役民三代之不厭而愈力其得人如此爲人和厚樂易於物無忤而執守甚堅善飲酒旣仕遂疏之勤於公務日中而食夜二鼓而寐盛寒暑不自逸率爲常其卒年五十有七

胡智

胡智字宗愚會稽人永樂辛丑進士擢監察御史巡按陝西夏大雪智疑有冤獄未伸悉按部內諸司獄有繼母不安其室子諫之者繼母誣以不孝智廉得其情訊之遂釋其子宣德間陞廣西副使龍州與交趾思郎州連歲交兵爭地智定以公議交人不敢復

爭景泰初陞廣西左布政使致仕十餘年足跡未嘗入公門蕭然蔬水老益矜重論者稱其學行之醇備焉

魏驥

魏驥字仲房蕭山縣人永樂乙酉舉人四年會試乙榜爲松江府學訓導遷太常寺博士甲辰從征國有大事驥悉與聞遷吏部考功司員外郎陞南京太常寺少卿正統三年陞行在吏部左侍郎以老辭調禮部又辭特改南京吏部示優待焉十三年九載入見乞致仕不允陞本部尚書景泰庚午四乞骸始得歸

時年七十有七自承事郎累轉至資善大夫天順甲申詔下進階榮祿大夫嘗纂修永樂大典聘考江西鄉試者二同考會試者三奉勅巡視畿甸持節慶代府冊封郊廟耕籍諸禮典無不預驥爲人端重祇慎簡默廉勤而好別白君子小人其少舉於鄉聞父病不俟撤棘而回耄年事其兄教諭騏愈益恭謹在學校嚴師道與諸生衣冠相對不問寒暑蒞官所至崇正抑邪務大體山川壇獲雙白兔圻內升瑞麥皆却弗奏在吏部時中官王振怙寵贊見惟怕一方振亦不較呼爲先生有進士未終制來欲爲考功者

同官可之驥曰選法不可擅又可上欺邪已巳之變  
驥在南都寢食靡遑率諸司條陳討胡安民之策多  
見施行法司因旱恤刑有王剛惡逆訴冤或以其年  
少欲緩之驥曰此婦人之仁天道不時正謂此也獄  
遂決翼日而雨又戍卒四人牧馬三人互毆一人死  
之有司却拷訊三人內一人當之驥曰罪一人則情  
可矜罪三人則律不合宜上請卒得 旨三人各杖  
一百改戍邊地餘多類此里居二十年無事不踰戶  
閭而遠邇敬禮候問者相屬於道遇鄉人言孝友忠  
信遇有官者言勤謹和緩布袍糲食不別治生其清



修苦節人或難之尤不忘憂國與民語及輒感額其鄉故多水患有楊龜山湖隄遺跡插堰塘瀝倡率修築一方賴之篇章之富山刊板刻幾徧天下有南齊集若干卷松江志水利切要理學正義等傳於世成化七年八月戊辰上御奉天門顧禮部臣曰魏驥壽及百齡兼有德望其勅遣行人存問賜羊酒有司月給米三石贍之勅未臨浙驥先以是年九月薨於里第有司已得請加例祭塋旣而其家以驥遺言上臣驥死無憾愧無以報朝廷恩恤之典乞辭免上曰老臣清儉固爾死尚然邪不可不成其志

其諾之茲兩事前所未有也先驥薨旬餘一夕大星  
殞其鄰王文政庭中驥忽就枕口占云平生不作欺  
心事一點靈光直上行及革語意不亂倏然而逝訃  
聞識與不識莫不嗟悼松人士相率走吊於門制服  
哭奠哀感尤深云謚文靖公初爲松江教官汲汲成  
就人才諸生在學者候一更盡必攜茶往視之見書  
聲者供茶一甌及至三更將盡必携粥以隨尚有讀  
書者供粥一碗且嘉其勤後出其門者顯宦甚盛正  
統初任吏部侍郎中官王振怙寵而驕每出則雖部  
堂尊官亦歛輿迴避一日相遇於崇文門不爲避王

南齊書卷之九十九  
三十一  
張省  
嘶之諧於內衆爲驥危忽一日上御便殿召吏部  
既至問孰爲右郎驥且訊以近日曾有何事驥慷慨  
言其故且曰臣不材位六卿臣不足惜朝廷名器可  
惜耳溫旨慰之曰爾所言者是好官好官

王暹

王暹字景陽山陰縣人登永樂戊戌進士第爲翰林  
庶吉士進元夕詩獲寶楮之賜授刑部主事卓有能  
譽陞員外郎宣德五年用大臣薦擢河南按察司副  
使丁父憂服闋調山東正統元年隨調陝西專督糧  
儲二年以軍功陞布政使司右布政使綜理繁劇庶

務克熙奉 勅勸濟得米一百五十餘萬石歲用不  
歉奏立范文正公祠於延安民禱輒應七年丁母憂  
去任吏民請留 上遣官邀諸途奪情復任九載秩  
滿應遷遲朝論難其代仍俾守原職以慰陝民正統  
己巳胡馬飲蘆溝京師戒嚴檄召還陞右副都御史  
守正陽門時遠邇軍民聚城下嗷嗷待斃乃啓西直  
門悉放入賴以存活者萬計尋 勅安撫順天等府  
及鎮守天壽山陵築立城堡統軍剿虜遂奏罷被害  
郡縣歲課物料民安之景泰元年 勅巡撫河南湖  
廣兼修築沙灣聽便宜行事保定張普山以妖言煽

舉於陳州發兵擒晉山誅之事遂定奏脩河工次第  
宜白黑羊山抵蕭縣每十里置舖專人提督修治仍  
乞減免濟南兗州科差以甦民困三年陞左副都御  
史未幾陞右都御史奏開封等府水災其遠運糧草  
乞量派別州縣運納又奏順天山西山東等處復流  
民業宜令有司撫恤寬免糧差又奉 勅考察河南  
湖廣鳳陽官員去畱惟允又奉 勅賑濟河南徐州  
饑民因奏開封等府州縣傷災五十一處乞蠲該年  
夏稅之半凡所奏 上皆從之又慮黃河水勢漸及  
汴城築堤四十餘里捍其外城民用免溺五年以災

與上疏自劾乞罷歸情懇甚上許之及陞辭蒙燕勞  
遂行已而河南官民交章乞留而已去矣既致仕杜  
門謝客優游林泉十餘年而歿享年七十所註有慎  
菴集四十卷奏議二十卷藏於家

張 崑

張崑字廷瞻上虞人舉永樂辛卯鄉試明年會試不  
第授宣城教諭時學校教弛士習趨下崑嚴立法程  
懇懇焉爲陳說朝廷命官立教之意推明聖賢之道  
以誨迪之滿考楊文敏公薦於朝陞當塗知縣當塗  
在畿內號劇縣賦繁役重力爲裁省求其敝弛而更

張之暇日從二卒循行鄉落視其作業以懲勸其勤惰姁姁然如家人父子而災爲之卹利爲之興尤甚於治家事苟於民未便雖沮於郡於憲臣必不苟爲阿徇而當路亦雅知之無齟齬焉時靖遠伯王公統師征麓川所過吏民多竄匿崑詣諸縣集徒衆具芻糧迎犒江上指麾調度俄頃而畢諸將校駭愕相顧歎無敢有囂譁者憲臣按郡嘗檄以攝廣德州事閱月而州治流民占復者以千數竟擢南京雲南道御史凡京衛訓練士卒城門戍守悉命督察疏劾冒禁者繩以法不少貸爲御史未二載陞鎮江府知府鎮

江密邇當塗務尤簡事不勞而理民不待喻而自化  
又二載以外艱去服除改泉州泉州郡大而民嚚稍濟  
以猛州有大道民惑於怪廢不由公單騎造焉民悟  
是日道復闢泉人士作詩頌之浚市河通舟楫毀尼  
僧廬舍百餘區卽其地改建社學里豪王大觀輩數  
十人糾結爲州里患侵漁公賦有司莫敢問民訟之  
布政使石公以其事屬崑召之卽至諭使自新盡輸  
其所侵賦會石公行部復屬致之其人見石公悔曰  
吾豈爲石布政來耶崑知其終必爲患以石公教數  
其罪杖殺之一郡稱快而大觀子稠竟與其黨潛走



京師誣以他事崑適入朝聞之卽自請獄 上命廷

臣按其事至泉泉人頌太守賢者溢達道事果誣奏

上卽日釋之命移知荊州而竄觀黨於北徭崑治荆

無異於泉而政尤嚴明蓋自鎮江至是滿九載因疏

乞歸而荆民方懇請留焉 上重違民意增秩三品

還命治荆崑念母老沉鬱不遷久之感風痺疾因復

疏乞歸 上固不許而竟援詔例棄官歸矣歸見母

拜且泣曰兒自今復得爲母之子也篤孝養不衰又

四年而疾作以至不起崑自爲校官以至治劇邑典

方州操履三十年如一日以爲居官之法教化爲本

而刑所以弼教也故所至以修學校爲首務其治刑  
訊決如流詭誕之徒望其容儀輒沮塞不敢吐聲氣  
無嚴刑峻法而遺愛常周於民當塗之民至於今思  
之遇其鄉人必細談善政至亶亶不已且問起居安  
否何若有繼以泣者民之不能忘也如此

### 楊信民

楊信民名誠以字行新昌縣人永樂庚子領鄉舉宣  
德庚戌擢工科給事中小心廉謹出使江西整刷軍  
伍民情宿弊上疏奏之皆當時急務改刑科有直言  
之節正統癸亥陞廣東左叅議受密旨許言事招

捕雷化高廉等州盜賊諸叛皆平蠻獠向化時按察使郭智所行多不法信民劾罷之黃翰來受代而所爲益甚又劾之連僉事韋廣黃亦誣詆信民俱逮下獄啓行時廣人爭携金帛就舟相贖俱不受旣至法司鞠得實黃坐除名廣之軍民耆老致仕官員及山徭洞人鹽場竈戶共一萬餘人連名具狀相率赴三司保畱乞備其事上聞亦有跋跡萬里直詣闕廷稱冤者動以千計歲已巳車駕北狩胡虜猖獗朝廷用言者起信民守白羊口是歲廣東都司囚黃蕭養越獄遂至嘯聚守土者閉門自守召邊將禦之多

爲所敗城中軍民朝不謀夕鄉民避亂趨城至則閉門不納及歸盡爲賊所戕脇從者日益衆賊爲輶輶車來攻城聲言楊大人家眷勿憂城破當護送還鄉廣人寓京者聯名上章乞信民遂授左僉都御史

勅往撫之至則廣城被困者數月矣卽開四門發倉廩賑饑下令有司給民木牌縱其出入賊見帶牌者皆曰楊大人所給俱不殺民皆喜悅相慶又出榜招撫之歸附者日以千計乃差桃山驛永某及餘丁何普受等齎榜文入賊營招撫諭以恩信蕭養大喜簪花設宴約日至城投降信民冠帶單騎而出隨從者

數人賊衆數十萬皆倒旗羅拜蕭養跪訴泣下乞示  
以更生之路信民坐自如諭以禍福卽日投降者數  
千人餘皆謹譟而去越五日又至信民復往見賊以  
大魚獻信民受之不疑投降者又數千人未幾董都  
督統大軍至賊遂中變景泰元年三月五日有大星  
殞於城外對岸之河南十二日質明都指揮使姚麟  
來白事尚與啜茶談議忽疾作扶入卧内卽仆矣城  
中軍民聞信民卒信疑相半旣得實爭走哭館下雖  
老嫗稚子亦至失聲滿城縞素具牌位哭奠者相屬  
陷在賊中者聞之亦曰楊大人死吾屬無生意矣黃

蕭養亦爲文具祭訃聞 天子悼甚遣官諭祭信民  
卒後僅閱月大軍卽平賊凡賊所經處盡屠之民仰  
天號曰使楊公在吾人豈受此禍哉廣人追送柩還  
哭奠者阻塞道路如喪考妣旣而耆老黎善聚等赴  
京奏請立廟於廣州額曰惠濟春秋致祭水旱疾疫  
必禱焉民有事不得其平者輒具詞焚告不直者輒  
恐懼服罪至今爲然成化己丑賜諡爲恭惠

呂升

呂升山陰人由永樂間舉人授溧陽教諭陞江西按  
察僉事坐事降官與纂修永樂大典復爲僉事歷山

西福建考滿陞大理寺少卿升清介勤慎爲僉事時  
所至以興學爲務能激揚士類爲少卿用法公平至  
宣德八年以老疾奏乞致仕從之仍命給驛還鄉

### 柴 欽

柴欽字廣敬餘姚人永樂癸未捧鄉書明年上春官  
第進士時 太宗初御極拳拳於作興儒術文士選  
進士中穎異之尤者二十八人象天之列宿使爲庶  
吉士欲其盡讀天下書必如古聞人之能以文名當  
世者欽在列益感激奮勵窮日夜不絕聲累積之厚  
故施諸文也質而華汪洋而沉著不蹈襲陳腐而駁

駁欲追古人轍跡尤善爲賦每出一篇輒膾炙人口  
會朝廷纂修大典徵天下遺書以備採摭欽薦其師  
國學典簿趙撝謙遂命馳傳卽其家取至京師與欽  
同纂修禮樂音韻書日進退館閣考索編著縉紳皆  
閔其勤卒以劬悴致疾歿沒時年三十六京師士大  
夫不問交不交者莫不惜之

徐初

徐初字復陽會稽縣人永樂癸未舉人授山東濰縣  
教諭秩滿擢戶科給事中洪熙元年陳治道十事皆  
見嘉納賜金織文綺陞都給事中宣德元年漢庶人



高煦反 上親征協贊有功賜臧獲四人英國公張  
輔朝會失儀劾其跋扈無人臣禮 上雖曲宥輔而  
心嘉其直尋陞大理寺卿中官姓阮者守遼東失利  
侍郎柴車按其當死者三十餘人初奏當誅首惡勿  
濫及非辜工部侍郎羅汝敬巡撫陝西坐事黜官遇  
赦吏部輒復其官言官劾以爲黨罪應死初曰是特  
失覆奏耳吏部因得釋初爲寺丞與楊復論事不合  
被劾俱下獄太史奏大理不見 宣廟特宥之爲復  
其官星乃見正統初調南京太常寺卿尋致仕景泰  
三年七月卒于家初爲人孝友寬平出言未嘗忤人

至於論事決疑侃侃形於色及卒朝野惜之

邵宏譽

邵宏譽字德昭餘姚人也永樂甲辰進士拜監察御史有風裁用薦擢翰林修撰預修宣廟實錄正統壬戌同考會試尋陞福建按察副使時坐閩寇鄧茂七反左遷寇平追錄宏譽功復湖廣副使致仕宏譽天性孝友親歿廬墓居官清慎囊無遺資毀譽不形犯而不校寬然長者也子銓泰州同知孫蕢廣東左布政使

嚴迪

嚴迪字允迪餘姚人漢子陵四十五世孫也通易春秋二經補邑弟子員貢入太學屢試首六館之士宣德五年出知江浦江浦邇畱都號難治迪一以長者化導之比屋欣戴在任九年以最聞時執政者素知迪於成均奏迪可大用已得 旨矣會 宣廟升遐部覆遂寢正統初入覲懇疏乞歸竟得以 前旨晉大理少卿致仕迪歸囊惟圖書家仍茅茨論者謂不愧高節之裔江浦祀名宦有傳

趙 魯

趙魯字尚確山陰人宣德初膺鄉薦名在高等歷任

教諭秩滿不調恬靜自如人服其不阿正統十二年  
陞國子典籍日端坐觀書詠詩校對梓刻訛缺或忘  
寢食倦則鳴琴自娛祭酒陳敬宗謂人曰趙尚確仕  
不近利學不近名對之坐談簡淡有味令人興起今  
之黃叔度也敬宗寄魯詩充棟羣書萬玉林縱觀窺  
見聖賢心每隨松影移瑤席時對梅花奏綠琴但學  
古人敦素履不同時俗論浮沉公餘最是怡情處青  
鳥時時送好音久之遷典簿益勤敏盡職不以爲卑  
秩滿引年致仕行李無一長物惟囊書數百卷而去

陳 贊

陳贊字惟成號蒙軒餘姚人博極經史期以策名科第作懷二都賦以見志已而再試有司不偶輒棄去用杭州府知府盧王潤薦爲儒學訓導嚴立條約啓迪有方門弟子出爲顯官者十餘人浙江左布政使黃澤雅重其文行金石制作必以屬之宣德乙卯纂修仁廟實錄天下郡國當會萃事蹟以上而兩浙十一郡之事贊實總之時稱有史才明年滿考起京簡任翰林待詔授中使書于內館群璫薰其教化成才者衆秩滿陞典籍尋遷五經博士未踰年以學士高公穀薦陞廣東布政司左叅議時寇黃蕭養之亂

甫平撫摩凋瘵極盡仁恤訪鰥嫠幼穉之被掠賣者  
贖還其家瘞兵卒遺骸親爲文祭之以憫其不幸聞  
者感悅其他善政宜民者類此廣民至今思之不忘  
景泰癸酉遷太常少卿祀典忝飭輿論稱愜天順丁  
丑疏乞致仕不許越三年再請始得休致時年六十  
有八矣適其子嘉猷有使滿刺加國之命因便道奉  
贄至杭以別墅在西湖之側遂留家焉先是浙中名  
卿大夫致仕家居者六七公南京吏部尚書魏公驥  
其一也聞其歸皆來會喜相謂曰歸老之榮皆上  
賜也乃約月一集爲恩榮會會必賦詩爲樂蓋不減

洛下風致云每遇良辰輒偕從弟致仕知縣賓及騷  
人墨士遊玩于湖山間其別墅中亭堂以十數皆幽  
勝可樂也客至必命酒投壺徜徉竟日鄉人羨慕之  
目爲神仙中人天順甲申 詔進階亞中大夫成化  
丙戌卽世距其生七十有五臨終神思清明謂次子  
嘉瑞曰吾家受國恩三世矣其語爾兄勉力以圖報  
稱語不及他所著有自娛藁容臺藁薇垣藁撫安錄  
歸田藁凡若干卷藏于家其和陶詩唐音及西湖百  
詠梓行于世

陳 詠

陳詠字永言餘姚人也幼從父戍居庸正統間魁順  
天第進士拜南臺御史侃直敢言時英廟北狩邸  
王監國進中興十四事尤指切將臣失事誤國者願  
甘心以謝天下又抗言亡徙長陵衛卒徙卽有變以  
故得不徙靖遠伯王驥有寵而專詠劾解其兵柄師  
討鄧茂七之黨勅詠監軍無一犯令者寇平降璽書  
旌之出爲陝西按察僉事母疾籲代母死詠哀毀亦  
死年纔三十六篋無一錢同官棺殮之耿清惠九疇  
歸其喪薦紳道奠者相望休庵王竑祭詠而忘其楮  
竑曰可無用也公生平不取一錢死安受此楮爲其



信重於名卿大夫如此

### 俞欽

俞欽字振恭新昌縣人景泰辛未進士選爲翰林院庶吉士授禮部儀制司主事天順初陞郎中癸未會試場火左遷松江府同知成化改元召還改兵部武選郎中乙酉征山東蠻寇有功陞太常寺少卿壬辰陞禮部右侍郎丁外艱起復爲兵部左侍郎制終始就任九載秩滿加正二品俸卒於官年五十四訃聞賜祭塋如例欽通敏有才幹處事善思慮而不失所居皆號稱職蓋能臣也時將以重任畀之而欽忽報

卒聞者多爲憫惜云

戚瀾

戚瀾字文湍餘姚縣人景泰二年進士選庶吉士瀾雖官木天清華之地而意象條然常欲駕風雲而斥八極覺非人世榮利可得而羈斂者天順紀元授編脩與大學士李公賢彭公時呂公原同纂脩大明一統志書成予告歸省歲餘詣京渡錢塘江抵暮風濤大作有絳紗燈數百對照耀江水徹底通明丈夫九人帕首袴鞬帶劒乘白馬飛馳水面一舟之人恟駭瀾曰母懼吾知之矣推窓謂九人曰若非桑將軍九

弟兄耶皆跪而應曰然曰去吾喻矣須臾悄寂且  
命舟人返棹曰有事吾當還遂歸謂家人曰吾某日  
逝矣及期沐浴朝服端坐頃之嚮九人者率甲士來  
迎屋瓦皆碎戈戟旌旄晃耀閃爍遂卒卒後車騎騰  
踔前後若有所呵衛者隱隱入空而滅久之丘文莊  
公夫人自瓊海入京舟泊鄱湖夜夢達官呵擁入舟  
曰吾翰林編脩戚濶也昔與丘先生同官義不容恕  
特報爾三日後有風濤之險隻帆片櫓無存可亟遷  
寓于岸夫人驚寤如其言移至寺中如期果瀕浪兼  
天衆舟盡溺夫人白其事于文莊公公以聞于朝遣

官諭祭于墓而文莊自爲文祭之且系之詩曰幽顯殊途隔死生九原猶有故人情曼卿真作芙蓉主太白常留翰苑名念我冥冥來入夢哀君惻惻每吞聲朝回對坐黃封酒悵嘆雞壇負舊盟

丁川

丁川字大容號東陵新昌縣人天順登甲申進士初授貴州道監察御史成化乙酉有大臣被罪求脫因結權嬖以誣忠良川以諫疏入卽正大臣之罪丙戌奉命巡漕河起利除姦政聲載道上政本君心聖學六事又上時政甦民困等八事爲上人知重令總三

司奏牘及案獄遂得總檢諸道事丁亥南京午門爲  
雷所擊川上䟽脩德以回天意 上嘉納之令群臣  
同加脩省時都御史張岐恃才玩法川䟽其六事遂  
劾罷之凡有所論擊必視川爲倡率凡大刑獄必視  
川以爲可否而後上聞 上知其忠義誠信可屬重  
任每稱名御史必曰丁川實有意大用矣川忘身殉  
國知無不言時外戚會昌侯孫繼宗操管十二營兵  
權重任其子瓚掌錦衣衛事川以其權任太重具䟽  
論諫 上俞允乃令其仍舊帶俸禮部尚書馬昂荆  
襄巡撫都御史楊璠怠事川上䟽論之卽令致仕時

中貴人玩法多被劾黜貴妃萬氏寵貫後庭干預外事川上疏諫正時 上方怒甚川亦住俸三月成化辛卯 皇太后崩 上因陵廟事方責言者川上疏諫曰衆臣之請天下之公論聖母之命一時之私恩也從天下之公則綱常正倫理明慰 先帝之靈愜天下之望從一時之私則綱常斁倫理虧違 先帝之意起天下之疑一事公私之間而天下安危攸係事竟得寢壬辰擢順天少尹初蒞政歷訪民隱上撫民賦役等五事值畿內蝗旱又疏救荒禦災十有五事聲譽著聞未幾擢總憲臺奉 勅巡撫延綏重地

因上備胡四事如開中淮浙積鹽等事以延綏逼河  
湟爲北虜出沒之衝三邊在陝者莫先焉繼上八事  
如揀擇將帥設置努矢操練士卒創立團堡等項又  
進安邊十策 上素知其賢所陳悉允行之平生清  
苦自勵雖親友纖芥之餽未嘗肯受平居無疾言遽  
色於凡勢利紛華泊如也接下吏以恭雖盛暑不衣  
冠不見奉太恭人石氏極孝雖祈寒暑雨公退之後  
朝夕未嘗離左右太恭人訃聞亟還哀毀骨立撫柩  
一慟不踰時而卒囊橐蕭然幾無以爲殮鄉士夫暨  
西川劉公伍山何公相與治後事 上憫悼之賜贈

有加又遣官諭祭以彰其德年方四十八歷官僅十五年耳所著有東陵文集傳於世

## 史琳

史琳字天瑞餘姚人成化丙戌舉進士丁亥授工科給事中時貴倖專擅朝廷稍事宴遊值上元張燈爲鰲山之觀費以數萬又頗崇飾浮屠宮寺相望抗章歷論無所避癸巳擢陝西布政司右叅議時鞏昌番賊爲梗始至掩擊之盡降其衆遂出行部自安定歷會寧金蘭抵秦州相度地勢增繕屯堡斥堠以斷賊路旣又轉關中之粟以實甘涼身自輸督往來邊徼



凡二年由是盡得其形勝要害及戰守方畧戊戌以  
憂去任壬寅復起爲福建布政司右叅議甲辰轉江  
西左叅政所部豪舉怙勢庇盜成習莫敢問悉鋤治  
之丙午袁吉饑極力賑濟全活者甚衆丁未春吉安  
民有殺其隣之子寅夜移置道傍被害之家莫知所  
由訴於琳緝之莫得乃禱於神曰境內平人被殺守  
土之責也願神告予以洗其冤是夜遂得之夢明日  
求之果得其人遂輸服已而贛盜起殺官吏攻破城  
邑琳督捕斬七百餘人釋諸脇從遂以無事弘治戊  
申陞右布政使辛亥轉左布政使民苦藩府歲祿至

倍蓰取未饜乃爲請於朝得自省轉輸自是遂免侵  
削琳旣佐政久悉諳諸利弊方銳意爲民興革尋擢  
陞右副都御史巡撫保定諸府兼提督紫荆諸關畿  
甸民困重役戍卒疲於罰班又滹沱漲溢壞民田廬  
時爲三患乃爲定徭役法奏免重稅並河上流穿支  
渠以殺水怒民賴以甦真定大名諸川果園皆居民  
世業嬖倖怙寵奏取以備供應琳力言其不可辭甚  
懇 詔遣官覆視果如其言乃止久之有司議增真  
保定惜薪夫役屢疏諍尤力 詔仍其舊丙辰入爲  
工部右侍郎與尚書徐公貫僂力曹務徐亦傾心相

倚一時多所裁正嘗因災異上六事曰止織造恤邊  
民停傳造惜供應節財用戒無益皆切時宜庚申轉  
左侍郎兼都察院左僉都御史經畧邊關首陳謹邊  
關以防衝突五事九載秩滿擢右都御史時虜寇猖  
獗朝廷方命將出師衆遂舉提督軍務已而報稍緩  
命先赴宣大會計兵馬芻糧虜退還京 命蒞院事  
辛酉入侍經筵是歲虜復寇榆林假琳軍法重權率  
偏師先往飭勵邊將琳乘機進戰屢有斬獲及保國  
公朱暉統兵至遂協謀直搗虜巢虜聞風驚遁毀其  
廬帳而還事聞璽書褒美副以銀幣寶鑑師還入見

陳邊務十三事甲子復以西北多警 命與保國公  
治兵京營乙丑夏 敬皇上賓國事槍攘而宣府遊  
兵復失利請濟師 上遽命出援於是琳出宣府保  
國公出大同分督諸將合勢邀擊遂以捷奏 上降  
璽書獎勵師還入朝遣中官迎勞寵賜有加明年丙  
寅爲正德改元正月卒先是一日火星犯左執法琳  
以爲已憂已而左都御史戴公珊卒親朋以爲解琳  
曰未也及代掌院事不踰月亦卒自居九卿前後請  
老十餘章 敬皇勉畱不許至是竟死於官年六十  
九訃聞 上賜祭葬如例旣而司馬奏論戎功贈太

了少保左都御史尋復以大臣例加贈太子太保又  
賜祭者再遣官護喪以歸琳狀貌魁偉望之知其爲  
貴人童時溺園池中死彌日畦人出而負之復生襟  
抱坦夷洞達與人不求備雖疏賤鄙劣見之皆獲自  
盡傳聞多藝射奕書繪之事兵法地理雅步占候與  
凡方藥之術咸識其要畧尤工墨竹有求者無貴賤  
皆欣然應之天性孝友執親之喪哀毀踰節廬於墓  
側者三年家素儉約清介如寒士而賙恤親黨則不  
遺餘力居常規模古人爲自警要語列之左右二屏  
每戒子孫曰昔先公省菴府君作宦三十餘年三掌

敎鐸四典文衡其所遺惟書數卷而已予竊祿明時  
惟恐橫叨青紫常俸所入足供朝夕不使家有贏貲  
以汙先德惟願爲吾子若孫者不墜箕裘永守予訓  
使後世稱爲清白吏子孫吾願足矣故琳雖歷官中  
外四十餘年而卒無餘蓄聞者莫不歎服

### 何鑑

何鑑字世光新昌縣人成化己丑登進士年非三十  
已上弗選近侍鑑甫二十八鄉先達有勸增年者鑑  
曰未入仕先欺君可乎庚寅竟出知宜興縣縣歲輸  
米數十萬石運戶攬納者妄費民苦額外加徵償貸

動以萬計鑑力請於巡撫每里選殷實六戶以二充  
運戶四充運夫共運米一白石每一戶徵銀十兩消  
耗米若干並付總部收支回縣稽算重徵之弊遂革  
又歲貢茶一萬五千斤例領南京馬快船裝送船軍  
無統紀惟私載射利反致官茶攘竊浥腐歲亦額徵  
貸百計又請每茶一斤收解錢三文顧船裝運罷馬  
船民皆便之隸兵火甲積年漁食小民一切罷革拘  
攝催徵惟責里役逾年宜興稱治一日村老百餘輩  
携二童捧薯蕷五束茶少許詣庭下曰吾儕小人不  
識官府自公下車犬不夜吠人安寢食故來見耳羅

拜而去巡撫都憲滕昭畢亨剡章交薦銓曹亦以政績卓異聞甲午召陞山西道監察御史乙未巡城捕盜時禮部奏度僧道請度者數萬相聚擾惑爲非乃建議寢其事遂散去丙申巡口北宣同等處時中貴廖禮協叅將周賢按妖人趙大事因誣良民百餘人以聞上命覆按失實乃責廖禮等曰妄殺無辜希陞賞論死者止三人徒者四人餘得免奉勅會給事中唐章查盤邊儲芻糧乃論黜監司以下不職者數十人連劾巡撫都御史鄭寧殷謙郎中曾會劉顯馬孝祖輩請逮捕繫獄殷謙停俸餘皆置之法時權



要子弟以攬納妄繩部運官吏因併論舊部下裨將  
孟璽胡觀等置於法者四十餘人皆落職邊境肅然  
戊戌差巡京倉首禁需索逮總督大監等麾卒置於  
法總督怒搆東廠下鑑錦衣衛獄竟亦不能害已亥  
巡歷鳳廬淮揚等處鳳陽 祖陵所在禁限三百里  
內凡盜寸木坏土者例皆處死充軍守衛者每以法  
害民鑑首申禁令許山間巡邏其平原地土聽民樵  
採畱守都指揮馮滕冀暉挾 勅怙寵罔法疏其事  
於朝二人卒以罪去官開釋諸冤獄坐死者十數輩  
辛丑擢知河南府河南商周漢唐故都多塚墓往往

爲民所發下車首嚴禁令人不敢犯屬邑宜永嵩盧  
有鑛洞封閉已久朝廷特勅大監陳喜同鎮巡開  
取鑑曰鑛脉已竭若更起常課是貽吾民以無窮之  
害也執不聽上復遣大監梁方開取卒無所得而  
止甲辰乙巳丙午河南山陝連值凶歲餓殍流徙相  
屬請盡出府庫銀兩遣官糴黍豆分賑屬縣復條陳  
救荒禦災十事具申鎮巡奏聞多見施行先有徵完  
糧稅以災停解至是詔蠲逋負差官賑濟故屬縣  
皆有備而內帑救荒之賜總司皆以給親藩官軍俸  
祿上下賴焉流民死者命於四方設義塚塋埋幾七

八萬軀遺孩收養濟院三年之間地方狼戾多相食盜賊殺官劫庫檄報紛紜獨河南一郡晏然當道特下鑑荒政於各府以爲式洛陽地方不滿百里稅糧幾十萬鑑以南陽汝寧二府稅糧亦各止十萬餘石洛陽一縣顧與二府相埒具奏懇切准照江南折銀事例克數丁未春陞山東左叅政將行軍民老弱號泣攀送弘治庚戌春陞四川布政使四川國初設茶課浥爛官吏老不得代乃議徵銀解部官民便之松茂邊儲歲苦豪黠攬納弊根牢不可拔悉擒置於法其弊遂革壬子冬轉本司左布政使入 覲癸丑春

陞右副都御史總理江南糧儲巡撫地方兼理浙江  
嘉湖杭三府稅糧國家貢賦仰給東南比年災傷公  
私困竭鑑訪究弊源以次興革甲寅蘇松大水饑民  
嘯聚攘寇官不能禁乃以便宜發未起運米十五萬  
石遣官分頭賑卹更條陳折兌運折祿米折食米折  
軍糧停料價停織造畱船料畱課鈔開鹽引存工價  
共十事以聞又疏乞照往年川陝存畱折銀二十萬  
兩兌軍米三十萬石分賑各屬皆准行之故所在民  
不知災九月奉 勅同工部侍郎徐貫濬吳淞白茅  
等港以泄積水不旬月厥工告成松江小民苦於輸

精加耗鑑以小戶多官田而糧重大戶多民田而糧輕遂令有司論田加耗民甚稱便乙卯正月丁父憂丁巳服闋起巡撫山東山東南北要衝接遞夫役歲計四五萬人官府濫增吏緣爲弊民不堪命乃度州縣繁簡酌里分多寡分派夫役立爲定規臨清德州倉場權貴攬尅納充巡捕官兵倚勢害民悉擒治隸戎籍者數十人闕里災舊廟金章宗所建規模卑隘爲請於朝開拓增建計工料銀十五萬兩皆取於抽分鈔關不歛於民己未冬陞刑部左侍郎命訊周藩大獄復命稱 旨賜羊酒寶楮陞本部左侍郎辛

酉秋奉 勅同三法司審錄罪囚賜羊酒冬十一月  
山東衮州等府直隸徐邳等州大旱奉 勅便宜賑  
濟首陳五事一借糧餉以資賑濟二乞通融以拯時  
艱三停料價以止無益四寬差役以寬民力五停工  
作以待豐穰悉報可時巨盜弄兵亟命有司賑濟饑  
民招撫流亡牛具種穀區畫備至壬戌七月訖事賜  
寶楮以勞之九月奔母喪南還時兩居憂備知鄉邑  
利病 以興革達司府力請施行鄉人啣恩感德相  
與醵金建祠肖像奉祀乙丑服闋適戶部獻民數  
孝廟按圖數戶以爲當今生齒繁盛戶口宜登而耗

弊在逃亡流移脫漏埋沒 命簡大臣考覈廷舉鑑  
以刑部左侍郎兼左僉都御史清查河南湖陝三省  
瀕行 孝廟賓天 武宗嗣位復申命鑑乃刊條檄  
申詳 勅旨二十餘事俾三省各知遵守自河之南  
河之北漢之左右窮鄉險道無不躬親巡歷仍奏委  
三省藩臬分方任職以督厥成隱藏者省發飛射者  
釐正流寓者不遣願歸者無禁民從役戎從伍匠竈  
各從其業聯而爲甲圖而爲里設畸零帶管以待貧  
弱無所歸依之氓於是三省計清過流移逃亡戶四  
十萬有奇竣事而還賜羊酒寶鈔因疏處置地方十

事以聞一曰請官給散戶由二曰處置附籍人戶三  
曰處置還鄉人戶四曰查理軍匠奸弊五曰嚴戶籍  
以革脫漏六曰嚴版籍以清里甲七曰嚴禁捕以靖  
地方八曰專委任以總地方九曰均田賦以安小民  
十曰設衙門以控地方復歸功於王瓊等一十二人  
請量加旌擢復陳途中所見軍民利病六事清允支  
以實京儲處驛傳以祛宿弊足兵食以備不虞停夫  
役以蘇民困添佐職以備任用均差操以障地方奏  
裨新政丁卯春陞南京兵部尚書叅贊機務時逆瑾  
挾權內外諸守權貴皆出門下鑑毅然不顧首檢覈



大小教場神機等營并操江官員刻剝者罷黜隱占  
者發舉軍中積弊一朝頓革及考選五十一衛所軍  
政官一以至公請託不行權貴斂手戊辰南京大饑  
瑾幸國災不允賑濟且勅南京運米三十萬石轉  
卹鳳陽鑑以留都地方重於鳳陽災傷甚於淮西會  
同內外守備直言辯奏始得停運及差官賑濟已而  
瑾凶焰益熾附之者紛然鑑未嘗與之一通訊問及  
刑部都察院長員缺廷論三薦之瑾終不用其黨錦  
衣衛千戶張文冕者鑑先巡撫蘇松時以詐僞事捕  
置於法後亡匿附瑾朝夕煽禍無所不至竟誣松江

官布事於瑾罰米七百石原籍上納慨然鬻產完之  
繼又捏闕里修造事罰米一千石寧夏上納鑑計無  
所充戶部隨爲乞恩寬宥 上特命蠲之庚午八月  
逆瑾文冕伏誅辛未春正月 特詔爲刑部尚書三  
月朝見 命侍講經筵讀廷試卷賜通鑑纂要四景  
回文詩夏四月偕大理等官審囚明允稱 旨賜羊  
酒夏五月改兵部尚書奉 勅提督團營軍務賜蟒  
衣玉帶會盜賊四出劉六劉七等起於畿甸藍廷瑞  
等起於四川李四等起於江西各竊僞號攻陷郡縣  
屠戮守臣敵殺官軍聲勢張甚時承平日久民不知

兵郡縣望風奔潰甚至開門迎款以故南北不通人情洵洵卽建議選將練兵嚴號令公賞罰募義勇起用逆瑾罷斥舊將都督白玉等數人奏行山東直隸等處修濬城隍選補軍餘機兵錄用民間武勇不許遺以資賊鄉村鎮店結伍立柵互相應援河南山西等處設兵守黃河斷大行以防奔突京操官軍俱畱本處分守郡縣又於漕運十二把總部下每船選精卒一人沿河駐劄以防運道商旅又請立大賞以消大患 詔悉從所議六月八日賊攻破棗強知縣段豸死之遂屠其城破廣平清河南宮故城獻縣而北

奏遣都督張俊王琮統兵分布霸州文安賊聞復遁  
回山東時馬中錫駐兵德州張偉駐齊東賊衆散而  
復合去省城密邇鎮巡三司惟登城覘望莫敢開門  
發一矢乃劾奏馬中錫張偉擁兵自衛縱賊不戰鎮  
巡守臣怯懦不職及劾都指揮桑玉受財啓禍通事  
王永與賊交通皆下獄桑玉伏誅王永亦斃於獄又  
請調宣府副總兵許太遊擊將軍卻永率部下入居  
庸關駐劄涿州延綏副總兵馮禎入紫荆關駐劄保  
定又奏請兵部侍郎陸完督理軍務凡軍容輜重山  
川地理險要一一規畫授以成算賊圍滄州不克進

抵霸州固安京師大震復奏請調陸完兵徑往固安  
完奉 詔抵平口賊欲遁去諸將合兵蹙之大敗軍  
威遂振捷聞賜羊酒初 上欲遣大監谷大用領兵  
剿賊鑑與衆議謂陸完邊有捷音非軍威不振但賊  
奔竄靡常不可得耳今宜益兵四路守截我軍不勞  
而賊自滅矣賊自東明之敗各已潰散有益都賊張  
興張旺者亦聚衆千餘在東平一路刼掠適主事張  
嘉謨督餉調官軍至遂與卻未敗賊於高麗店殲殪  
殆盡賊覘知谷大用毛銳等官軍在臨清復奔霸州  
忽絕城馳報蓋賊以十二月朔 車駕出郊圖犯御

蹕時鑑未寢左右無一吏卒乃自具帖子令家奴遞入長安門逐門遞入司禮監直房轉奏上知復寫牌傳各門嚴加防守又總城賞報通州良鄉涿州各守備官整備人馬兼以常制駕出南郊分調人馬於南海子蘆溝橋羊房各三處下營以防衝突處分已定漏下五鼓矣頃之上命司禮太監召至左順門問今日駕可出否對曰駕當早出以安人心車駕遂出迄暮方回賊知有備遂西奔掠新城雄縣而南破饒陽博野等縣覘知祁州備禦有方乃迂道徑攻高邑保安高陽由真定掠趙州安平直抵晉州

某城柏鄉衡水等處鑑計賊非東向臨清必南奔彰  
德移文促陸完督兵分道追襲至彰德賊方圍湯陰  
聞官軍至望風遁去許太馮禎郤永等追戰敗之渡  
河陷溺死者無算時十一月十八日也又明日賊衆  
萬餘突至復圍李瑾馮禎營許太與禎瑾夾攻賊失  
利敗走已而楊虎劉七分夥自宿遷渡河攻破睢寧  
靈壁虹縣轉掠至亳州奪船渡河百戶夏時用火炮  
擊之舟覆賊帥楊虎與其黨九人俱溺死部下劉三  
趙風子邢老虎代領其衆勢復猖獗入河南境攻破  
州縣殺戮守土官兵圍燒房屋劫掠金帛發毀墳墓

受禍極慘時裕州同知郁采率義兵力戰弗支死親藩及守臣告急鑑建議復於宣府許太邵永大同李鉉遼東劉暉延綏時源馮禎諸將部下續調未發官軍各若干分道赴之復以諸賊分責諸將計日勦滅而議請簡命遼東巡撫都御史彭澤與咸寧伯仇鉞提督河南軍務以前所續調官軍仍畱山東聽陸完等調用朝廷賜鑑麒麟服壬申正月二日忽傳報賊仍抵霸州攻圍甚急京師復大震鑑默計續調宣府邊兵已到涿州密召郎中汪舉從容如無事衆竊訝之舉至乃徐與衆別詣部押牌調邊兵之在涿



州者亟趨霸州賊聞遁去先是陸完聞賊北奔恐犯京師卽調許郤二將追至德州方懼獲罪忽報賊被許遊擊部下擊走東遁矣二將驚喜不知所爲久之乃知爲續調者嘗語人曰何公此舉旣解霸州之圍復紓吾輩之罪旣遠東續調官軍亦至十二日駕出郊祀禮成上下帖然郤永率續調兵追賊至山東大敗賊帥李隆於穆陵關隆奔入劉七營劉七怪其反覆斬之遂併其衆復奔河南陸完分調諸將許太等率兵追勦適巡撫鄖陽都御史李士實亦請調湖廣土漢軍兵以備流賊鑑卽奏行李士實分委總兵

方壽祥等赴河南會勦時源神周等軍尋亦俱抵汴  
梁諸將分兵截殺大敗賊衆斬獲無算賊夜奔商水  
倉惶阻河不能渡官軍若併力蹙之賊可殄滅因紀  
功御史雷宗力勸諸將朝崇府盤桓久之賊因得渡  
商水破西華鄆陵偃城等處至河南府賊逸我勞副  
總兵馮禎戰死賊亦敗去提督紀功鎮巡等官隱匿  
朝王誤事情實止以馮禎陣亡聞鑑劾之徵宗下獄  
賊自河南之敗徑奔汝寧總兵仇鉞都御史彭澤分  
調諸將追勦所斬甚多生擒賈勉兒楊寡婦乘勝追  
逐趙風子兄弟就擒劉三走死河南寇平捷聞 上

降勅獎勵劉六劉七等乃東入陳萊掠膠州平度萊  
陽文登招遠攻圍寧海潛入海套陸完等復分調卻  
永許太等諸將會兵追勦賊潰分作兩隊一隊由高  
密西奔李鉉追至臨朐沂水勦滅無遺其劉六劉七  
等一隊復北走霸州乃奏調叅將成釗等統領京軍  
都御史陸完寧杲亦各分調諸將會兵截殺賊乃越  
霸州徑往雄縣迤南直抵山東南度黃河由鳳陽入  
湖廣至武昌據掠濱江兩岸劉六爲先鋒調防守土  
兵迎擊溺水死劉七徐彥明益糾合水寇掠剽陸完  
統領諸將邊兵分布要害處擒捕天道効順撲毀賊

舟官軍四面蹙之齊彥明授首劉七溺水死寇黨始盡無復孑遺時都御史陳金尚書洪鍾亦以平江西四川捷報上論功行賞有差進太子太保蔭子容爲錦衣衛百戶又特命進階光祿大夫勲柱國癸酉江西四川餘孽復起具劾提督巡撫等官請命都御史彭澤總兵時源赴四川賊未平以人言致仕自爲卿佐踐上卿在朝多所汲引文臣如王瓊彭澤俞諫武臣如馮禎許太邵永時源等皆其推薦云

### 楊榮

楊榮字時秀餘姚人也成化壬辰進士初授南工部

上事丁母憂服闋補北水部已出視河壽寧侯家人  
挾勢干禁立寘於法卒爲蜚語所中逮詔獄釋歸尋  
卒榮襟度夷曠長於詩嘗會試還舟中取唐音和之  
旬月成帙被罪雖南冠而縶不廢吟咏其履常蹈危  
所養有過人者書學懷素尤善寫竹清風爽籟如其  
爲人孫大章嘉靖癸未進士終刑部左侍郎先備兵  
三輔計縛都市大盜守荆南時遼王佚蕩無檢大章  
以祖訓惕之終其任王不敢逞自叅藩晉南鴻臚  
尋貳刑部亦其聲寔茂也榮雖官不竟志卒顯厥後  
而要之著述垂世固自有不朽者焉

謝遷

謝遷字于喬餘姚人自幼穎慧志趣不凡皆以遠大期之成化甲午鄉試爲第一乙未會試第三廷試一甲第一人授翰林院修撰奉詔入館勤而且謙爲諸元老所重御史某驟陞都憲臺中循例請爲文以賀峻拒之衆服遷正直辛丑同考禮部一甲三人其二皆遷所取士人咸服其精鑑癸卯冬滿九載陞右春坊右諭德甲辰再同考禮部孝宗毓德春宮慎簡侍從首及遷乙巳充經筵講官丁未孝宗登極推恩宮僚陞左春坊左庶子兼翰林院侍讀仍加

俸一級初開經筵奉勅爲日講官與修憲廟實

錄內侍郭鏞者請選妃嬪以備六宮遷言上方諒

陰豈宜有此俟山陵旣畢徐議之未晚也命禮部

議如遷言上方勤學遷務積誠以開悟聖聰每

先期輒焚香莊誦如侍天顏及當講敷暢詳明甚

稱上意庚戌以省親請聽給驛往且賜金帛爲道

里費辛亥實錄成陞詹事府少詹事兼翰林院侍講

學士加俸如前冬十月母鄒宜人卒癸丑父簡庵又

卒訃聞皆蒙特恩賜葬祭乙卯春詔以本官入

閣辦事時猶未終喪八月服闋赴京疏辭不允陞詹

事兼秩如舊蓋 皇太子將出閣讀書欲重儲端之  
任故以輔臣領之丙辰 命主會試所取多知名士  
是歲累有鶴袍犀帶之賜丁巳勅修大明會典爲總  
裁官戊午春 皇太子出閣奉 勅陞太子太保兵  
部尚書兼東閣大學士遷因上疏以親賢遠佞勤學  
戒逸爲 皇太子勸 上嘉納之清寧宮災上疏請  
修人事以回天變詞甚剴切且引咎避位不允己未  
賜一品服太監李廣死欲例加 恩典遷力陳其不  
可辛酉虜犯大同遷疏安邊機宜以進 上卽行之  
本兵以軍興國餉匱乏欲加南方折銀每石三之二



遷曰 先朝以官田稅至重故立折銀以寬之今若  
再加民不堪命矣蓋節用以紓用乏乎虜騎尋遁國  
用不乏其事遂寢時視朝稍宴諸司章奏或有不報  
者兼以工役頗繁遷累言之皆見采納且有玉帶蟒  
衣之賜癸亥會典成陞太子太保禮部尚書武英殿  
大學士武岡蠻寇平賜俘奴一人甲子以災異再乞  
避位不允 孝肅太后崩因先年禮官預擬與 孝  
莊太后並祔 太廟至是遷請 命集衆議以正典  
禮尋別議如周姜嫄之禮立奉慈殿祀之識者多其  
贊襄之力時承平旣久政漸寬弛而近習怙侈尤甚

有齊玄者奉使武當山欲漸激濁揚清便宜行事等語於 勅中遼東首將張天祥妄殺冒賞近倖欲曲庇之遷皆執不可至觸 聖怒不卹也內府各庫及諸倉場馬坊蒞事內臣多作奸索賂民不勝其害而御馬監軍士自以禁旅不隸本兵虛兵冗食莫敢誰何其弊尤甚一日忽召對命通行禁約且令所司搜剔弊端嚴立科條有犯者必懲不貸皆從遷請也遷知上圖治甚切委任甚隆思盡革諸弊以肅正化若軍匠之曠缺戶口之衰耗以及屯田鹽法馬政等事將漸次修舉以復於舊事方有緒而官車晏駕矣

上大漸召至御榻執遷等手諭以善輔嗣君勸之進學無忘今日之命遷等悲慟而退 武廟登極 勅加少傅兼太子太傅餘秩如舊纂修 孝廟實錄充總裁官初開經筵賜冠帶衣履蓋追念 先帝遺命付託之重待遷等甚厚但近習蠹政漸不可長戶部尚書韓文率百官伏闕論之賴遷等主張於內將寘諸犯於法會事預泄遂不克遷等皆不能安於位矣十月再引疾乞休 允之賜 勅給驛月廩五石歲隸八名仍賜金幣襲衣遷等旣去吏部尚書焦芳入閣而太監劉瑾擅柄於內芳急於幸進憾遷嘗舉王

鑒吳寬而不及已瑾又以遷等先嘗裁抑及今廷論之故尤切齒焉二人乃深相結納欲甘心於遷因遣偵卒四出伺察遷事竟無所得會鄉人有以賢良應薦者瑾爲違 詔格以遷咎與劉公健俱褫職又矯旨令遷弟武選員外郎廸致仕子編修丕除名且欲追奪 誥勅會瑾敗而止遷之去位也臺諫交章奏畱皆逮繫詔獄備遭慘毒至死不悔遷旣歸瑾意叵測人皆危之遷處之裕如日與客圍碁賦詩以自娛若不知有憂患者歲嘗大饑出粟以賙貧乏族黨鄉閭賴之祠堂成每旦必具衣冠率子孫焚香恭謁忌

辰必茹素茶物豐潔其儀一遵文公家禮俾世守焉  
庚午瑾誅 詔復職致仕辛巳臺諫連疏薦之遣行  
人齋 勅存問復其官廩輿隸如舊而增其數焉迪  
起叅議不復任翰林遷遣子正入謝 溫旨褒答蔭  
爲中書舍人時徐夫人卒正乞終制仍賜祭葬如例  
癸未復令有司時加存問丁亥二月遣行人陳侃齋  
勅起遷於家且 命鎮巡藩臬敦促上道十月抵京  
勅進少傅戶部尚書謹身殿大學士初大學士費宏  
衰病將乞休曾具疏舉遷自代宏去而邃庵楊一清  
又以遷薦意若虛元佐以遜遷者天下皆相慶遷復

入而賢一清之能讓及遷至京而一清以官尊不皆  
處遷之下乃竟違初志輿論頗少之遷在舟中嘗具  
二疏大意以安靜寬厚爲本及入朝自度衰年且難  
徇時力求生還遂不果上然上待甚隆嘗以天寒  
免朝叅以除夕賜御制諸詩以郊祀賜錦織大帶以  
疾在告遣太醫視藥餌遣中官賜酒米少間則遣鴻  
臚卿趣出視事而遷竟以疾辭乞休辛卯二月以疾  
卒壽八十三贈太傅謚文正大學士費宏云公器宇  
豐厚風神秀朗其忠誠端慤始終不渝所謂清白之  
操百鍊愈精剛毅之氣萬人必往誠如聖諭也其

學以明義理爲先爲文正大溫厚不事雕琢可以垂  
之不朽在內閣時劉公敢於任事而資公之謀斷李  
公長於爲文而資公之典則公可否其間不阿不激  
同寅協公所以輔成盛治者端在是也

王鑑之

王鑑之字明仲號遠齋山陰人成化戊戌進士初任  
真定府元氏縣知縣至則減稅蘇困除土惡孫整等  
數人民樂其業後離任遠近相送者如失父母擢江  
西道監察御史奏劾寵妃失序中貴忤權杖之下錦  
衣獄得復職差往直隸河南等處印記孽生馬疋萬

計巡按貴州辨死囚劉英等一十五人俱得生劾方  
面等官崔昇等九十二員貪風頓息劾土官楊泰等  
八員俱落職征勦久叛蠻夷長脚鷄選等并招撫楊  
安等一百七寨弘治四年督學南畿公正剛明適大  
理寺右寺丞缺科道爭薦太宰耿公裕不然且語衆  
曰必得譽望服群者如南畿提學王御史可也衆議  
翕然提學陞九卿者自鑑之始江西宗室有宮人逃  
出藩臬執留奏誣以宮闈穢污上命往鞠之乃坐  
王以用刑過嚴而藩臬失體擅畱宮人之罪各相奏  
辨有附執政者更命刑部侍郎戴再鞠之反案奏



聞因其異遂提取來京躬自臨朝訊鞠鑑之待罪閣下上悟曰古人之待宗室甚厚盡從前擬遂受知孝廟後遇宗室事必屬之及考績陞本寺右少卿山西宗室互相訐奏往鞠之究撥置者俱置之大辟宗室之罪有差陞左少卿十三年十一月北虜寇徧頭關上命改僉都御史奉勅便宜行至則增要害撫軍士禦虜有方虜不敢犯劾太監總兵等官羅玉等巧取軍士財物邊境肅然奏繳復任陞左僉都御史撫治鄖陽等處振肅綱紀所屬揣有不可容者皆望風解綬而去陞左副都御史巡撫湖廣奸豪膽落

吏畏民懷正德元年陞南京刑部右侍郎二年轉刑部右侍郎到任轉左時河南徽世子累奏庄田不結命往鞠之係民者悉歸於民上下帖然陞俸一級推南京都察院右副都御史陞刑部尚書賜玉帶會逆瑾擅權籍沒錢都御史家產瑾欲罪擬妻奴執法不從將男分戍各邊事畢正德三年冬引年七十三疏力辭勅馳驛還鄉自任官無被劾家居田不滿頃管糧蘇通判令人送俸至卽答詩謝曰老大登朝四十年何曾問舍與求田歸來幸遇蘇司業日日令人送酒錢正德十四年秋以疾卒壽八十四

王華

王華字德輝餘姚人也成化辛丑進士第一人歷官翰林終南京吏部尚書弘治中內侍李廣有寵華爲日講官嘗講大學衍義至唐李輔國結張后表裏用事誦說朗朗左右皆縮頸吐舌上樂聞之講已遣中官賜尚食正德初逆瑾專政士大夫爭走其門華時爲禮部侍郎獨不往子守仁論瑾瑾益怒出之南京尋傳旨令致仕華坦夷洞直無所蓋覆而立身大節凜凜不渝晚思山陰爲先世故居又自姚徙越城光相坊居焉世廟登極錄守仁擒濠功華進封

新建伯

黃珣

黃珣字廷璽餘姚縣人孕十四月而生聰慧絕人讀書過目輒成誦年三十三舉成化辛卯鄉試第一人越辛丑廷試第一甲第二人授翰林院編修二十一年丁外艱服闋當弘治改元與修憲廟實錄二年充經筵官是歲書成陞本院侍講賜宴及白金文綺四年充經筵講官丙辰分典會試文衡適太學司業缺進右春坊右諭德管司業事辛酉陞南京祭酒未任丁繼母憂孝宗念經幄舊臣特遣官爲營葬事

及諭祭十七年釋吉復任補國子祭酒明年陞南京  
吏部右侍郎正德二年陞本部尚書旣而逆瑾以私  
憾之遂致仕九年卒於家年七十有七贈太子少保  
歷其子一人珣爲人簡易厚重忠實之性出於自然  
凡經筵進講於前代理亂興衰之事必反復深陳之  
與以感悟 天衷會試所選拔皆天下知名士掌南  
北太學振頽起廢百度具舉養諸生恩義兼至有山  
西人魏成者家貧不能歸止一女業已聘人欲改聘  
同舍生以資途費珣廉知卽撥門差以濟之其餘或  
病給以藥或死無所歸爲之殯殮者甚夥故一時士

翕然感頌之又斥其公餘銀若干繕理號舍完輯公  
廨正德改元時爲少宰卽偕冢宰三山林瀚條六事  
以裨新政頗見采納其爲詩文典雅平澹如其爲人  
所著有惕齋稿東山文集素菴詩集藏於家

### 張景明

張景明字廷光號葵屏山陰人也幼聰慧日誦千餘  
言年十二三補邑庠弟子員成化庚子登鄉試庚戌  
登第時 睿宗皇帝初開藩邸長史馬政輩以不職  
罷 孝宗皇帝命吏部擇可爲代者尚書王恕卽以  
景明爲左長史袁宗臯爲右長史人多惜此兩人不

得他用者景明日賈誼董仲舒不有聞於時乎忻然  
入謝 睿皇於諸王館諭之曰卿等皆名賢當大用  
今屈卿爲輔幸共黽勉以善聞於世耳景明等頓首  
謝明日上疏勸 睿皇正心謀學以周公及漢東平  
河間爲期深見嘉納又獻爲善最樂詩以寓規諷  
睿皇賜以金帛居數歲從之國詔賜正四品服國中  
事無巨細皆經畫有法上書陳六事 睿皇優旨答  
之仍賜金帛久之又上廣胤嗣通恩澤厚風化養心  
源屏左道免括增田六事 睿皇稱善歲丁卯以憂  
去 睿皇奏虛其缺以待越三歲返國 睿皇晏駕

世宗爲世子方在諒陰令攝國事中外肅然景明尋  
病力求去 世宗慰畱有忠厚清真之褒病且死謂  
所善大學曰死何足恨但嗣君幼冲不得終輔之以  
酬先王厚德耳卒旬月 世宗入繼大統時人皆惜  
景明不得大用追贈太子少保禮部尚書文淵閣大  
學士謚恭僖子元恕廕光祿寺署丞元藩廕太學生